

## **COVID-19: 489 kes baharu, tiada kematian dilaporkan hari ini**

**Astro Awani**

**07 Oktober 2020**

**Hilmi Malik**

KUALA LUMPUR: Kementerian Kesihatan Malaysia (KKM) memaklumkan terdapat sebanyak 489 kes baharu positif COVID-19 setakat Rabu menjadikan jumlah keseluruhan jangkitan di Malaysia sebanyak 13,993.

Menurut Ketua Pengarah Kesihatan, Tan Sri Dr Noor Hisham Abdullah, Sabah kembali mencatatkan peningkatan dengan pertambahan sebanyak 282 kes dengan jumlah keseluruhan kes di Sabah kini sebanyak 3,020 kes.

Bagi tempoh sama, Kedah kini menjadi negeri kedua tertinggi dengan pertambahan sebanyak 153 kes menjadikan jumlah keseluruhan jangkitan di negeri itu sebanyak 1,600 kes.

“Daripada jumlah itu, 487 merupakan penularan kes tempatan manakala dua lagi merupakan kes import.

“Sebahagian besar penularan di Kedah melibatkan Kluster Tembok di Penjara Alor Setar manakala di Sabah melibatkan kawasan di zon-zon merah,” kata Dr Noor Hisham dalam kenyataan media pada Rabu.

Ketika ini juga, kata beliau, sebanyak 40 kes sedang menerima rawatan di Unit Rawatan Rapi (ICU) dan daripada angka itu sebanyak 13 kes memerlukan alat bantuan pernafasan.

Sementara itu, sebanyak 74 kes dilaporkan telah sembuh sepenuhnya dan dibenarkan discaj menjadikan jumlah kumulatif kes sembuh sebanyak 10,501 kes.

Setakat hari ini juga, tiada sebarang kes kematian baharu dilaporkan menjadikan jumlah keseluruhan kes kematian COVID-19 kekal sebanyak 141 kes.

**© 2020 Astro Awani Network Sdn. Bhd.  
(535275-D) All Rights Reserved.**

Source: <https://www.astroawani.com/berita-malaysia/covid19-489-kes-baharu-tiada-kematian-dilaporkan-hari-ini-262582>